

գլխաւորին՝ Նազարէթին և «այլոց վերահայրաց աշխարհակիսնաց», որոնք զինքն վերստին կոչած էին Կ. Պոլիս, և անոնց դրդումներով, կը սկսի աւելի նեղել պանդուխտ քահանաները: Եթէ քահանայ մը ընթերցման սխալ ընէր, հրապարակաւ կը խայտառակէր (Դարանաչի, էջ 124):

Քահանաները երեք աստիճան (տասն կարմիր, տասը դըշ. և հինգ դըշ.) տուրքի կ'ենթարկէ, տարուան մէջ երեք անգամ վճարելու պայմանով: Քահանաները վերջին ծայր անձկութեան և տագնապի կը մատնուին, և ինքզինքնին ազատել կը խորհին: Գաղթականներէն զիրքի տէր մարդիկ ծածուկ կը դիմեն Ռամատան անունով Պալթածիլար Քէհեասիին, որ կամախի Մարէք գիւղէն ազդեցիկ արքունի պաշտօնեայ մըն էր, ու դրամի ուժով անոր միջոցաւ Սուլթան Ահմէտէն հրովարտակ մը կը հանեն Դարանաղջիի անունով, որով անոր իրաւասութիւն կը տրուէր իր հեղինակութեան ենթարկելու էրզրումի էյալէթէն՝ այսինքն գրեթէ բովանդակ Հայաստանէն գաղթողները և զանոնք ինքնագլուխ հովուելու (Դարանաչ. էջ 128-129):

Գրիգոր Կեսարացի այսպէս պատճառ կ'ըլլայ որ Կ. Պոլսոյ պատրիարքութիւնը 1607ին երկուքի բաժնուի. վասնզի Դա-